



Novembera 8, 2021  
Tapvainak Atuattaugialik

## **Pilaugitsi tapvani wogimi piggogutiKallusi kappianattukosimajunik**

*Nunatsiavut AngajukKânga Johannes Lampe ukuninga uKausiKakKaujuk ullumi:*

Inuit asingillu NunaKakKâsimajuit kânatami, Novembera 8, ilitagijaugutiKavut NunaKakKâsimajuit Unatatsimajuit Ullunganik.

NunaKakKâsimajuit inuit ilautitaugunnalaungitut Sivullipâmi kingullianilu Nunatsuamiulimât Unatannisuanut. Isumagijaulaungitut nunaKanninginnik kânatami amma pivitsaKattitaulaumatik angnigusugunagiamut. Taimaigaluattilugu, ungatâni 4,000 NunaKakKâsimajuit angutet, ilauttilugit Labradorimi Inuit, ilaulaukKugit Sivullipâmi Unatannisuamut ungatânilu 300 tuKutausimalauttut. Asigiallangit 20,000 pigumasimalaukKut kiggatugiamik kingulliani unatannisuami ungatânnettut 200 tuKutausimalaukKut. Unuttugiallatât ilausimavut akigattotijunnut taimatsumanganit, amma unuttugiallait unatattumevut ullumi.

Labrador Inolluta pisittotiKagiaKavugut itsiniKagatik angutinnik annanilu kappianattumegunnaittilauttut nunatsuagilittatinni – pisittotigillugit kappianattukosimanningit, ammalu Kimaillutik uvattinut ikKaumagatsanik.

Donestâgimi , Novembera 11, IkKaumanniup Ullugivauk – nalunaitsijuk nâjisimanninganik Sivullipâmi Unatannisuangusimajuk atutillugu 1918 uKumaittut nâjittilugit ailfangani sitontimi ailfangani ullumi ailfangani takKimi Jâmanet atitâgitillugit Unatagunnainimmut AngiKatigegutimmik. IitatsiutiKammijuk unataKatausimajunik kingulliani Nunatsualimâmi Unattannisuangusimajumi, koreami Akigattotinnet, Afghanistanimi asingi nillu akigattotijuni nunatsualimâmi.

IkKaumallugit taimaita ullok, pikKujivunga ilonnainik Ikajuttaugutilinnik, nanimiutaugaluagutsi, nukKalaulaullausi nipaKagasilu atautsimi minotimi piggogutigillugit kappianattukosimajut sulijugitsialugillu aliasutiKagunnaatilluta kappiasugunnainimmik ullumi.

**Tusagatsaligijinni Kaujisapviugunnatuk:**  
Bert Pomeroy, Aulatsijik Tusagatsaligijinni  
(709) 896-8582